

REGIONAL NEWS

HEADLINES:

1. Health Minister Pi Lalrinpuii'n Private damdawiin thenkhat zingah Mizoram Universal Health Care Scheme zawm duh an awm tih sawiin thawhhona thuthlung ziahfel tep a ni a ti.
2. Congress MP Shashi Tharoor chuan Pi Lal Riliani chu Nu ropui leh ngaihsanawm, Mizo ti hmingthatu ani a ti a, a sulhnu ropui tak chu hriatreng ani tawh dawn tih a sawi.
3. Home Minister Pu K.Sapdanga'n hunpui puala midangte hnena luangchhuak an awm thin chu lawmawm atih thu sawiin uar deuh turin mipuite a sawm.
4. Assam-a cheng vbch sing 1 leh 601 senga leitha siamna tur hmun dinna tur lung, Prime Minister Narendra Modi-a'n Dibrugarh Dist-a Namrup-ah phum.

<><><>

HEALTH MINISTER

Health Minister Pi Lalrinpuii'n Private damdawiin thenkhat zingah Mizoram Universal Health Care Scheme MUHCS zawm duh an awm tih sawiin thawhhona thuthlung ziahfel tep ani a ti a, tunhnaia BN Hospital, Aizawl nen thawhhona tur thuthlung an ziaak thei chu lawmawm atih thu a sawi.

Health Minister chuan social media kaltlangin BN Hospital, Aizawl nen an thawkho tur lawmawm atih thu a sawi a, MUHCS chungchangah Private Hospital thenkhat zingah Mizoram sorkar thawhpui tum an awm mek thu sawiin thawhhona tur thuthlung pawh ziah fel a ni tep tawh a ti a, Kohhran hrang hrang Damdawiin te pawhin mipui rawngbawlina a ni tih hria a health care chungchanga sorkar hmalakna an rawn zawm chu lawmawm atih thu a sawi.

Health Minister hian December ni 16-a Press Conference a neih-ah sorkar tangka kum kal lai April ni 1 atanga December ni 16 inkarah Mizoram Universal Health Care Scheme hnuaia damlo mi 59,602 enkawlina senso cheng vbch 100 chuang sen ral ani tawh tih a sawi a, Mizoram Universal Health Scheme in senso a tumsak damlo zinga za a 68.56% chu sawrkar damdawiina enkawl an ni a ti bawk.

<><><>

SYNOD PRISON MINISTRY

Home Minister Pu K. Sapdanga'n nimin khan Synod Prison Ministry buatsaih, Jail tang chhuak ten nun kawng dik an zawh zel theih nana um zuina hun 'Ex-prison inmates follow-up programme' a hman pui.

He programme hi Aizawl Nursery Veng Presbyterian Kohhran Hall-ah hman ani a, Jail tang chhuak eng emaw zat an tel ani. Home Minister Pu K. Sapdanga leh Rev. Dr. Rosiamliana Tohhawng ten thu an sawi bakah Jail tang chhuakten an Testimony an sawi bawk.

Jail tang chhuakte pual hian kum khatah vawi hnih hun hman thin a ni a. Tun tum hi kumina vawi hnih an hmanna niin mi 192 an kalkhawm ani.

Mizoram Synod hian Jail-a rawngbawlina hi kum 1984 atang khan a kal pui tan a. Tunah hian Mizoram chhunga Jail 10 awmah Synod Prison Ministry Sub. Committee din vek a ni a. Counsellor 10 ruai mekin,

Pathianniah hun bik neiin Jail-ah hian an inkhawmpui thin a kum 40 chuang chu he rawngbawlna hi kal pui a lo ni tawh a ni.

<><><>

LAL RILIANI'S FUNERAL

Nimin zing dar 9-a thi Chief Minister hlui Pu Lal Thanhawla nupui, Pi Lal Riliani chu vawiin chawhnu dar 1 khan a lawina Zarkawt Presbyterian Kohhran Sunday School Hall-ah vui a ni.

Pi Lal Riliani hi kum 1989-a Delhi a a inentirin chuap lam natna Bronchial Asthma a nei tih hmuhchhuah a ni a. Kum 2002 khan ruhsehpui a nei tih hmuhchhuah a ni leh a. Kawng hrang hranga inenkawlin harsatna lian tham tawk loin a awm a. Kum 2020 Covid lockdown puan hnu lawk khan lungphu buai, mild stroke tum hnih neiin pacemaker vuahsak a ni. Kumin November thla tawp lam khan hritlangin bawhin a thawhah a chhuak leh bawk a. Tun thla ni 2 a ICU a dahluh anih hnuah nimin zingkar khan a boral ta a ni.

Pi Lal Riliani hi kum 1943 khan Lungleiah a piang a. February ni 24, 1969-ah Pu Lal Thanhawla nen inneiin fapa 1 leh fanu 3 bakah tuchhuan 1 an nei a. Chief Minister hna chelhtu a pasal tawiawm thin nu chhuanawm leh invawng tak a ni a. Zuk leh hmuam do kawnga hma la tu pawimawh tak niin kum 1989-ah a hoin Indian Society on Tobacco & Health, Mizoram Chapter din a ni a. He pawlah hian President leh chanvo dang pawimawh tak tak a chelh thin ani.

<><><>

FORMER CM WIFE CONDOLENCE

Congress MP Shashi Tharoor chuan Pi Lal Riliani chu Nu ropui leh ngaihsanawm, Mizo ti hmingthatu ani a ti a, a sulhnu ropui tak chu hriatreng ani tawh dawn tih a sawi.

Chief Minister hlui Pu Lal Thanhawla nupui Pi Lal Riliani hian ui tu a ngah hle a, Sawrkar mi pawimawh tak tak bakah Central lama Congress hotuten an ui thu an sawi a, Congress MP Shashi Tharoor chuan Pi Lal Riliani thi chu Pu Lal Thanhawla te chhungkua bakah Mizo mipuite a tawrhpu takzettih sawiin, a sulhnu ropui tak te chu hriatreng ani tawh dawn ani ati a, a pasal Pu Lal Thanhawla a thlawpna avangin a pasalin hna ropui tak a thawk thei tih sawiin a phena hna ropui a thawh chu chhuanawm atih thu a sawi a, a damchhung huna a thiltihte hriatreng ani tawh dawn tih a sawi.

Larsap General Vijay Kumar Singh (Retd) chuan Pi Lal Riliani chu vantlang tana a hnathawhte hriat reng anih tur thu sawiin a sulhnu chu chhuanawm atih thu a sawi a, a kalsan tak Pu Lal Thanhawla te chhungkua a tawrhpu thu sawiin zuk leh hmuam do kawnga tha thawh hlawk a nihna chu chhuanawm a tih thu a sawi bawk a ni.

Chief Minister Pu Lalduhoma pawhin Mizoten Nu ropui an chan a ti a, Mizoram tana a inpekna, entawntlaka a nungchang mawi tak leh thianghlimna leh hriselna kawnga mipuite zirtirtu ropui tak a nihnate chu an theihnghilh dawnlo tih sawiin A pasal Pu Lal Thanhawla a tawrhpu takzet a ti bawk.

Leader of Opposition MNF Vice President ni bawk Pu Lalchhandama Ralte pawhin Pi Lal Riliani a ui thu sawiin Mizoram tan channa nasa tak ani ati a, BJP President Dr K. Beichhua pawhin Pi Lal Riliani chu an ui takzet tih sawiin Mizoram tana a thiltih te an hre reng dawn tih a sawi bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

HOME MINISTER

Home Minister Pu K.Sapdanga'n hunpui puala midangte hnena luangchhuak an awm thin chu lawmawm atih thu sawiin uar deuh turin mipuite a sawm.

Krismas puala thuchah a sawi ah he thu hi sawiin Pu K. Sapdanga chuan Krismas lo thleng tur chu chatuan nunna atana khawvel in thilpek hlu ber dawn hriatrengna anih avangin Krismas hunah Kristiante leh Mizoten, pawl ang leh mimal anga, midangte hnena thilpek hun remchanga an hmang thin chu lawmawm atih thu sawiin uar deuh turin mipuite a sawm ani.

Home Minister chuan Mizoram chu India rama state ralmuang ber ti a chhal ngam a nitih sawiin, chhung lam leh pawn lamah, ralmuanna tiral ti thei boruak engmah awm loin, Mizoram mipuiten ralmuang takin Krismas hun a hmang dawn niin a lang a ti a, Mizoram mipuiten kumin Krismas leh Kumthar hunpui chu thlamuang taka an hman theih nan, sorkar chuan dan leh thupek khauh takin a keng kawh a, mipuiten hunpui chu hlim tak leh ralmuang taka an hman theihna turin, tlawmngai pawlte nen pheikhai rual taka thawkhoin, ruahmanna siam a ni a ti a, mipuite pawh theihtawp chhuaha dan kengkawhtute tawiawm turin a sawm a ni.

Pu K.Sapdanga chuan Nikum lamah halpuah leh halmawi khauh takin khap a nih thu leh mipuite pawhin an thlawp tha viau nia a hriat thu a sawi a, kuminah chuan khapna chu sut lovin, sorkar leh tlawmngai pawlte chuan, halpuah leh halmawi that loh dan leh hlauhawm dan inzirtir uar kum atan hman ni se tia a rel angin thuawih taka lo dawngsawng leh turin mitin a sawm a, Mizoram chhung leh khawvel ram danga Zo hnahthlak zawng zawngte Krismas leh Kumthar Chibai a buk bawk ani.

<><><>

NO VEHICLE ZONE

Coordination Committee on Traffic Management thukhawmin a lo rel tawh angin, kumin Krismas leh Kum thar vuakvetah Aizawl khawpui chhunga mipui kea bazar kalte him zawk nan December ni 23, 24 leh ni 31 ah 'No Vehicle Zone' hman tur a ni a, Chanmari leh Zodin Square inkarah chawhma dar 10:30 atanga tlai dar 4:30 chhungin lirthei eng chi mah tlan phal a ni dawn lo a, hei hian Emergency duty bakah natna avanga damdawiin pante a huam lo vang.

Chanmari leh Zodin Square inkara 'No Vehicle Zone' hman a nih lai hian lirthei engmah dah phal a ni dawn lo a, No Vehicle Zone huam chhungah hian chhim leh hmar inkalpawhna kawngpui khar a nih dawn avangin a helna tura ruahman kawngpui dungah traffic jam avanga harsatna a thlen lohna'n bungrua leh lirthei engmah dah phal a ni lo bawk.

<><><>

PM VISITS ASSAM

Assam Dibrugarh Dist-a Namrup-a cheng vbch sing 1 leh 601 senga leitha siamna tur hmun dinna tur lung, vawiin khan Prime Minister Narendra Modi-a'n a phum a, he plant atang hian kumtin urea metric ton nuai 12 leh sing 7 siam chhuah theih beisei a ni.

Pu Modi-a chuan leitha siamna plant din tur chu Assam mai bakah thenawm state-te tan a chhawr nahawm hle dawn tih sawiin ramdang atanga leitha lak luh thin pawh a tlakhniam phah dawn a ni, a ti a, mi tam tak tana eizawnna siamtu leh industry lama helai bial hmasawnna thlentu a ni dawn a ni, a ti bawh.

Prime Minister hian nimin khan Guwahati-a Lokapriya Gopinath Bardoloi International Airport Terminal Building thar a hawng a ni.

<><><>

SHIVRAJ SINGH ON VB G RAM G BILL

Union Agriculture & Farmers Welfare Minister, Shivraj Singh Chouhan-a'n Viksit Bharat G Ram G Bill chu MGNREGA thuam thatna a nih thu sawiin hmasawnna leh miretheite tana ruahman a ni, a ti. He Bill-ah hian thingtlang chhungkaw tina puitling chinte tana scheme hmasaa ni 100 inhlawhna ruahman thin chu ni 125-a tih punna tur a tel tih sawiin inhlawhna tur a awmlo anih pawha unemployment allowance siam sakna tur leh hlawh pek tlai palh pawha pek tlai ai phuhrukna turte pawh a tel a ni, a ti a, loneitu harsatna tawkte khaichhuahna tur a tel thu pawh sawiin he Bill atan hian cheng vbch nuai 1 sing 5 chuang ruahman a ni, a ti bawh.

<><><>

SOUTH AFRICA SHOOTING

South Africa-a West Rand bialah vawiin khan silai keng-ten mi 9 an kaphlum a, midang engemawzatin hliam an tuar bawh. Police sawi danin, pawl khawihna hi South Africa khawpui lian ber, Johannesburg bula thleng a ni a, he thil hi ngawrh taka chhui hna thawk nghalin tun thlengin man erawh an la neilo a ni.

<><><>

RLYS FARE RATIONALISED

Railways chuan tun thla ni 26 atanga hman turin rel chuan man a tidanglam hret a, ruahmanna thar ang chuan Ordinary Class-a zin turte tan Km 215 thleng, chuan man tih san a ni lova, hemi piah lam Km tin pawisa pakhat zela tih san a ni a, Mail leh Express rel Non-AC class-a chuang turte tan Km tin, pawisa 2 zela tih san a ni thung a ni.

AC class chuan man chu Km 1 zelah pawisa 2-a tih san a ni thung a, Rel chuan man tih san avang hian cheng vbch 600 vel, sorkarin a hmuh belh beisei anih thu, Railways chuan a sawi a ni.

<><><>